

BAB TIGA

- 3.0 Tempat kajian : Rumah Faith
- 3.1 Sejarah Rumah Faith
- 3.2 Objektif Rumah Faith
- 3.3 Struktur organisasi
- 3.4 Aktiviti-aktiviti yang dijalankan
- 3.5 Aktiviti kanak-kanak di Rumah Faith
- 3.6 Kewangan Rumah Faith
- 3.7 Masalah-masalah yang dihadapi oleh Rumah Faith
- 3.8 Rancangan-rancangan masa depan

3.0 Tempat Kajian : Rumah Faith

Rumah Faith, sebuah rumah kebajikan bagi anak yatim dan mereka yang kurang bernaib baik telah dipilih oleh penyelidik sebagai tempat kajian bagi kajian sosialisasi.

Rumah Faith terletak di Kajang iaitu di alamat :

No. 11,13 & 14, Jalan Sebelas

Taman Kajang Baru,

Jalan Sungai Chua,

43000 Kajang,

Selangor Darul Ehsan.

(No. Telefon : 03-0364500)

Alamat pos pula adalah :

Rumah Faith

P.O Box 20,

43007 Kajang,

Selangor Darul Ehsan.

Kedudukan sebenar Rumah Faith boleh dilihat di dalam peta lakaran pada Lampiran A.

3.1 Sejarah Rumah Faith

Rumah Faith adalah suatu tempat yang menyediakan perlindungan dan penjagaan bagi kanak-kanak yang didera, yatim piatu, terbiar dan ditinggalkan oleh keluarga serta mereka yang terlalu miskin.

Rumah Faith dimulakan dengan usaha Rev. K.K Sinnadurai dan isterinya. Rev. K.K Sinnadurai adalah seorang pastor di gereja

Kajang Assembly of God (AOG). Dengan itu, Rumah Faith telah diletakkan di bawah penyeliaan AOG, sebuah pertubuhan agama Kristian.

Menurut Pastor Sinnadurai, Tuhan telah memberikan mereka suatu tugas dan impian untuk memulakan sebuah rumah anak yatim semasa percutian beliau dengan isterinya di Sri Lanka pada tahun 1978. Setelah melawat sebuah rumah anak yatim di situ, beliau terseru dan ingin untuk memulakan sebuah rumah untuk kanak-kanak yatim piatu. Setelah pulang kembali ke Malaysia, beliau telah banyak berfikir, membincang serta bertukar-tukar pendapat dengan orang lain. Akhirnya dengan banyak berdoa kepada Tuhan, Rumah Faith dimulakan pada bulan Februari, 1985.

Pada mulanya dua buah rumah teres satu tingkat disewa bagi menempatkan dua orang kanak-kanak dan tiga orang kakitangan sepenuh masa. Pada hari ini, Rumah Faith mempunyai lebih kurang 60 kanak-kanak dan 10 orang kakitangan sepenuh masa yang tinggal di dalam enam buah rumah sewa. Sebuah rumah untuk kanak-kanak lelaki, sebuah lagi untuk kanak-kanak perempuan, sebuah rumah lagi untuk kanak-kanak lelaki yang lebih dewasa, sebuah rumah sebagai pejabat dan dua buah rumah lagi untuk tempat tinggal kakitangan.

Pada masa yang sama, Rumah Faith kini memiliki sekeping tanah seluas tiga setengah ekar dan diharapkan pada suatu hari dapat dibinakan sebuah bangunan yang cukup besar bagi menampung kesemua kanak-kanak, kakitangan serta menyediakan berbagai kemudahan bagi sukan, dapur, perpustakaan, bilik-bilik belajar dan lain-lain lagi kemudahan.

Oleh kerana pertubuhan Rumah Faith tidak mendapat apa-apa bantuan daripada kerajaan, maka keperluan-keperluan bagi Rumah Faith diperolehi daripada kutipan derma dalam bentuk wang tunai ataupun barangan keperluan lain. Hasil dermaan ini diperolehi daripada orang perseorangan, gereja-gereja, organisasi serta syarikat-syarikat swasta. Di samping itu,

berbagai aktiviti juga dijalankan oleh Rumah Faith khas bagi pengutipan derma.


3.2 Objektif Rumah Faith

Matlamat utama Rumah Faith adalah untuk memberikan kanak-kanak suatu tempat kediaman yang baik, penuh dengan kasih sayang, penjagaan dan berdisiplin. Ia juga berharap dapat menyediakan masa depan kanak-kanak ini agar lebih cerah dari segi rohani, akademik, sosial dan fizikal.

Bersesuaian dengan objektif ini, tema Rumah Faith adalah " We Care " dan dengan ini jelas memberi gambaran mengenai objektif-objektif berikut :

- (i) memberi perlindungan dan tempat tinggal kepada kategori kanak-kanak yang didera, yatim piatu, terbiar dan ditinggalkan oleh keluarga serta mereka yang terlalu miskin.
- (ii) memberi kasih sayang dan penjagaan rapi kepada mereka.
- (iii) memberi peluang untuk mengikuti pendidikan formal di sekolah-sekolah kerajaan.
- (iv) menyediakan aktiviti-aktiviti untuk memenuhi keperluan-keperluan mental, sosial, jasmani dan rohani mereka.
- (v) menyediakan mereka untuk menghadapi masa depan dengan berjayanya.

3.3 Struktur Organisasi



Jawatankuasa Pentadbiran Rumah Faith

Sebuah jawatankuasa pentadbiran ditubuhkan bagi melihat kepada masalah-masalah pengurusan serta pentadbiran Rumah Faith termasuklah masalah-masalah seperti masalah kewangan, masalah pelajaran dan sebagainya. Jawatankuasa ini tidak mempunyai pejabat tetap dan mesyuarat sebanyak satu atau dua kali sebulan diadakan di gereja atau di Rumah Faith. Kesemua ahli-ahli jawatankuasa pentadbiran adalah ahli secara sukarela.

Jawatankuasa Pengurusan Rumah Faith

Jawatankuasa pengurusan ini adalah di bawah penyeliaan jawatankuasa pentadbiran. Tugas ahli-ahli jawatankuasa pengurusan ini adalah tertumpu khas kepada pengendalian serta pengurusan Rumah Faith. Kakitangan pengurusan mengadakan mesyuarat setiap bulan dan mereka adalah kakitangan yang dibayar bagi sepenuh masa.

3.4 Aktiviti-aktiviti yang dijalankan

Berbagai-bagai aktiviti telah dijalankan oleh Rumah Faith sejak ia ditubuhkan pada Februari, 1985. Kebanyakan daripada aktiviti-aktiviti yang dijalankan itu adalah untuk mengutip derma terutamanya dari segi kewangan untuk membolehkan pihak pengurusan Rumah Faith menjalankan serta meneruskan aktiviti-aktiviti mereka.

Di antara aktiviti-aktiviti yang pernah dijalankan adalah seperti berikut :

(i) Jogathon Kebajikan '90

Jogathon Kebajikan '90 telah diadakan pada tahun lepas, bertujuan untuk mengumpul wang dan wang yang dikutip telah digunakan untuk membeli sebuah van bagi kegunaan Rumah Faith.

(ii) Charity Bazaar

Charity Bazaar diadakan di sebuah rumah yang disewa. Di sini penjualan barang-barang terpakai dijalankan. Alat-alat elektrik seperti alatan pejabat, perabot, radio, televisyen, peti sejuk dan alatan rumah yang lain ada dijual di sini. Harga jualan adalah berpatutan dan untungnya dimasukkan ke dalam tabung Rumah Faith. Walau bagaimanapun, Charity Bazaar yang dibuka pada tahun lepas telah ditutup kerana kekurangan kakitangan bagi

mengurusnya sepenuh masa dan sambutan daripada orang ramai pula kurang menggalakkan. Kini rumah yang disewa bagi Charity Bazaar telah digunakan untuk menempatkan kanak-kanak lelaki yang lebih dewasa.

(iii) 6th Anniversary Dinner

Majlis makan bagi menyambut ulangtahun pembukaan Rumah Faith diadakan setiap tahun. Pada tahun ini, ia merupakan sambutan ulangtahun ke enam bagi Rumah Faith. Seperti tahun-tahun yang lepas, pertunjukan dan penjualan tiket diadakan untuk mengumpul wang bagi projek pembinaan Rumah Faith yang baru di atas sekeping tanah seluas tiga setengah ekar.

(iv) Program Penajaan

Bentuk bantuan yang amat diperlukan oleh Rumah Faith ialah dalam bentuk tajaan kewangan. Di dalam hal ini, suatu " Sponsorship Programme " diadakan, di mana seseorang boleh memilih mana-mana kanak-kanak dan membiayai perbelanjaan persekolahan dan keperluan hariannya.

Pengiriman wang tajaan hendaklah menggunakan Cek Berpalang atau " Postal Order " yang dibayarkan kepada Rumah Faith. Wang tajaan tersebut tidak diberi terus kepada kanak-kanak tetapi akan disalurkan kepada dua tabung iaitu :

Tabung Wang Saku Kanak-kanak	(\$15.00)	-	30%
dan Tabung Makanan Kanak-kanak	(\$55.00)	-	70%

Di pihak penaja pula, beliau akan menerima satu gambar serta huraian ringkas latar belakang seorang kanak-kanak yang ditajanya. Setiap tahun semasa penajaan, beliau akan menerima laporan tentang perkembangan kanak-kanak tersebut. Tujuan di sini

adalah untuk membolehkan pihak penaja mengenali siapa kanak-kanak yang ditajanya. Di samping itu, penaja juga dibenarkan menulis surat ataupun menghantar kad kepada anak yang ditajanya. Walau bagaimanapun, kanak-kanak di Rumah Faith tidak boleh dijadikan anak angkat. Ini adalah kerana kebanyakan daripada mereka berasal daripada keluarga miskin dan rumahtangga yang kucar-kacir. Oleh itu suatu hari kelak mereka yang masih mempunyai ibu atau bapa akan pulang ke pangkuan sisi mereka. Mereka yang tidak mempunyai ibu atau bapa biasanya diterima kembali oleh saudara-mara yang terdekat. Rumah Faith hanya bertindak sebagai penjaga sementara kepada kanak-kanak tersebut.

3.5 Aktiviti Seharian Kanak-kanak di Rumah Faith

Kegiatan kanak-kanak di Rumah Faith boleh dilihat dalam jadual-jadual waktu yang dibentangkan seperti dalam mukasurat sebelah. Jadual-jadual tersebut adalah bagi hari-hari yang bersekolah. Pada hari minggu atau cuti persekolahan, aktiviti seharian berubah sedikit dengan tambahan kepada aktiviti-aktiviti di luar.

Jadual-jadual berikut dibahagikan kepada dua iaitu

- (i) Jadual Waktu Kanak-kanak Bersekolah
- (ii) Jadual Waktu Kanak-kanak yang belum Bersekolah

(i) Jadual Waktu Kanak-kanak Bersekolah

<u>Sesi Pagi</u>		<u>Sesi Petang</u>	
5.30 am	Bangun dan membersihkan diri	6.45 am	Bangun dan membersihkan diri
6.00 am	Sembahyang doa pagi	7.15 am	Sembahyang doa pagi
6.15 am	Sarapan	8.00 am	Sarapan
6.30 am	Bertolak ke sekolah	8.30 am	Masa bertugas
2.00 pm	Pulang dari sekolah	9.30 am	Masa belajar
	Berkemas	10.30 am	Berkemas ke sekolah
2.15 pm	Makan tengahari	11.15 am	Makan tengahari
2.45 pm	Masa rehat	11.50 am	Bertolak ke sekolah
3.30 pm	Masa bertugas	7.00 pm	Pulang dari sekolah
4.00 pm	Masa belajar		Mandi dan berkemas
5.00 pm	Masa minum teh	7.45 pm	Makan malam
5.30 pm	Masa permainan	8.30 pm	Masa belajar/tuisyen
6.30 pm	Mandi dan berkemas	10.00 pm	Sembahyang doa malam
7.00 pm	Sembahyang doa individu	10.30 pm	Lampu dipadamkan
7.30 pm	Makan malam		
8.30 pm	Masa belajar/tuisyen		
10.00pm	Sembahyang doa malam		
10.30pm	lampu dipadamkan		

(ii) Jadual Waktu bagi Kanak-kanak yang belum bersekolah

- 7.30 am Bangun dan membersihkan diri
- 8.00 am Sembahyang doa pagi
Sarapan
- 8.30 am Masa bertugas
- 9.30 am Masa belajar / bebas
- 11.00 am Masa permainan
- 12.00 noon Makan tengahari
- 1.30 pm Masa rehat
- 4.00 pm Tugasan rumah / Belajar
- 5.00 pm Masa minum teh
- 5.30 pm Masa permainan
- 6.30 pm Mandi dan berkemas
- 7.00 pm Sembahyang doa
- 7.30 pm Makan malam
- 8.00 pm Masa belajar
- 9.30 pm Sembahyang doa malam
- 10.00 pm Lampu dipadamkan

3.6 Kewangan Rumah Faith

(i) Punca-punca sumbangan kewangan

- (a) Badan-badan sukarela seperti Kelab Rotary, gereja-gereja, syarikat-syarikat swasta
- (b) Orang perseorangan
- (c) Melalui aktiviti-aktiviti yang dijalankan seperti Jogathon, Majlis Makan, Festa Makan, 'Jumble Sale' dan sebagainya.

- (d) Melalui program penajaan
- (e) Lain-lain

(ii) Perbelanjaan bulanan

Perbelanjaan bulanan Rumah Faith meningkat setiap bulan, selaras dengan pertambahan bilangan kanak-kanak yang diterima masuk. Kebanyakan daripada punca kewangan digunakan bagi membiayai perkara-perkara yang disenaraikan di bawah ini, iaitu :

(1) <u>Pentadbiran</u>	
Gaji	\$ 3 500.00
Penyelenggaraan pejabat dan lain-lain kegunaan	\$ 1 000.00
(2) <u>Sewa</u> (6 buah rumah)	\$ 2 000.00
(3) <u>Makanan, pakaian biasa dan pakaian seragam</u>	\$ 3 000.00
(4) <u>Wang saku dan tambang bas</u>	\$ 1 000.00
(5) <u>Lain-lain</u>	\$ 500.00
	<hr/>
	\$ 11 000.00
	<hr/> <hr/>

(iii) Punca-punca sumbangan bukan kewangan

Selain daripada sumbangan kewangan, Rumah Faith juga menerima sumbangan dalam bentuk barangan daripada individu-individu dan syarikat-syarikat. Seorang individu misalnya telah membiayai hantaran bekalan ayam sekali seminggu kepada Rumah Faith. Ada pula yang menjual sayur di pasar Kajang selalu menghantar bekalan sayur secara percuma kepada Rumah Faith.

Kanak-kanak di Rumah Faith juga kadang-kala menerima jemputan daripada berbagai pertubuhan atau restoran yang memberikan makanan secara percuma. Ada juga individu yang belanja mereka makan dari

semasa ke semasa bila menjelang hari perayaan seperti Hari Krismas.

3.7 Masalah-masalah yang dihadapi oleh Rumah Faith

(i) Masalah kewangan

Masalah yang paling utama ialah masalah kewangan. Sumber kewangan sebahagian besarnya adalah bergantung kepada badan-badan sukarela dan individu-individu yang kadang-kala tidak tetap. Sedikit kelambatan ini akan menyulitkan pengurusan Rumah Faith serta menjejaskan rancangan-rancangan pada masa akan datang.

(ii) Masalah kesesakan penghuni dalam setiap rumah

Seramai 58 kanak-kanak ditempatkan di dalam 3 buah rumah sewa. Rumah lelaki terdapat 32 orang dan rumah perempuan pula terdapat 26 orang. Oleh kerana kekurangan ruang dalam setiap rumah, setiap bilik terpaksa diduduki oleh lebih kurang 6-8 orang. Masalah kesesakan ini mengakibatkan ketidakselesaan di kalangan kanak-kanak. Masalah ini diharap dapat diatasi dengan pembinaan bangunan yang lebih besar pada masa akan datang.

(iii) Masalah kekurangan kakitangan terlatih

Kebanyakan kanak-kanak yang tinggal di sini adalah mereka yang telah mengalami pengalaman pahit seperti mereka yang didera, ditinggalkan oleh keluarga dan telah melalui suatu perkembangan sosial yang kurang sihat. Kanak-kanak seperti ini amat memerlukan para kakitangan yang berkemahiran dalam cara pengendalian kanak-kanak dari aspek bimbingan, kaunseling dan sedikit pengetahuan tentang psikologi kanak-kanak. Jika ada bantuan daripada kakitangan terlatih ini

mungkin kanak-kanak dapat dipulih dengan kehidupan normal dalam masa yang lebih singkat. Keupayaan untuk mengatasi tekanan psikologi dan emosi membolehkan kanak-kanak ini lebih bersedia untuk menghadapi masa depan mereka.

(iv) Masalah kanak-kanak lari dari Rumah Faith

Masalah dan tekanan emosi ke atas seorang kanak-kanak boleh menyebabkan seorang kanak-kanak ingin melarikan diri daripada segala benda yang merunggingkannya. Oleh kerana itu adakalanya berlaku kejadian kanak-kanak yang lari diri dari Rumah Faith. Walau bagaimanapun mereka yang lari diri dapat dikesan dan ditempatkan semula dengan kerjasama polis.

3.8 Rancangan-rancangan masa depan

Beberapa rancangan telah dikenalpasti untuk dilaksanakan bagi melicinkan pengurusan Rumah Faith dan mengatasi masalah-masalah yang sedang wujud. Rancangan-rancangan ini, ada yang sudah dijalankan dan ada pula yang masih di dalam pertimbangan untuk dilaksanakan. Rancangan-rancangan masa depan Rumah Faith boleh dibahagikan kepada dua kategori utama secara amnya iaitu Rancangan Jangka Masa Pendek dan Rancangan Jangka Masa Panjang.

(i) Rancangan Jangka Masa Pendek

Oleh kerana pertambahan bilangan kanak-kanak yang menyebabkan masalah kesesakan, lebih banyak rumah harus disewakan bagi mengatasi masalah ini. Tambahan pula, masih ramai lagi kanak-kanak yang menunggu untuk tempat masuk ke Rumah Faith. Jadi, jika keadaan mendesak maka banyak lagi rumah perlu disewa bagi menampung mereka ini.

Aktiviti-aktiviti akan dipertambahkan lagi mengikut minat serta keperluan kanak-kanak supaya mereka akan berasa seronok tinggal di situ. Lebih banyak aktiviti-aktiviti di luar mungkin akan diadakan agar kanak-kanak tidak berasa bosan kerana sentiasa tinggal di rumah.

Bagi mengatasi masalah kewangan pula, lebih banyak aktiviti seperti jogathon, pesta makan dan konsert harus diadakan, terutamanya menjelang musim cuti sekolah. Kegiatan-kegiatan ini di samping dapat mengisi masa lapang kanak-kanak juga boleh mendapatkan sedikit sumbangan serta bantuan daripada badan-badan kebajikan dan individu.

(ii) Rancangan Jangka Masa Panjang

Rancangan jangka masa panjang yang paling utama sekarang ialah mengumpul wang sebanyak \$ 300,000.00 bagi pembinaan bangunan baru Rumah Faith di tanah seluas tiga setengah ekar yang telah dibeli di Semenyih. Pembinaan bangunan baru ini diharap dapat menampung 200 orang kanak-kanak dan memberikan lebih keselesaan kepada mereka. Di samping itu, memperkenalkan latihan kemahiran bagi penternakan, jahitan, mekanik motor, pertukangan kayu dan pertanian bagi kanak-kanak yang telah meninggalkan bangku sekolah.

Bagi meningkatkan taraf perkhidmatan kakitangan pula, pemilihan rapi harus dijalankan, sebaik-baiknya mereka yang mempunyai pengalaman serta sedikit pengetahuan tentang psikologi kanak-kanak, bimbingan dan kaunseling. Usaha boleh dijalankan oleh Rumah Faith bersama pertubuhan lain supaya dapat menghantar mereka untuk latihan dalam bentuk bengkel, seminar dan kursus. Buku-buku yang berkaitan juga boleh dibeli dan disimpan di Pejabat Rumah Faith untuk bacaan para kakitangannya.

Akibat daripada pertambahan penghuni di Rumah Faith, sebuah bas mini amat diperlukan untuk menghantar mereka ke sekolah. Seramai 51 daripada 58 kanak-kanak adalah bersekolah. Buat masa kini mereka dihantar ke sekolah dengan bas sekolah yang perlu dibayar perkhidmatannya setiap bulan. Selain daripada keperluan bas bagi menghantar mereka ke sekolah, ia juga diperlukan bagi menghantar ke tempat-tempat tertentu untuk aktiviti-aktiviti luar.

Selain daripada Rumah Faith yang ada sekarang bagi kanak-kanak tidak bernasib baik, cadangan juga dikemukakan bagi mengadakan Rumah Orang Tua, Rumah Kanak-Kanak Buta dan Rumah Untuk Janda. Rumah-rumah seperti Rumah Faith ini sedang dalam pertimbangan untuk diadakannya di negeri-negeri lain di Malaysia.